

Date – 14/08/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

1. Larsap Gen (Retd) Vijay Kumar Singh a Independence Day thuchahah hmasawnna kawng zawh turin thalaite chu ruihhlo laka inthiar fihlim turin a chah.
2. An dinhmun atanga dah hniam school ten Provincialise an phût chungchang chu karleh Thawhlejni khian Special Cabinet meeting-in a ngaihtuah dawn.
3. Larsap Gen (Retd) Vijay Kumar Singh an India ram thendarhna naah Chittagong Hill Tract then anih ve avangin Zo Chin thahnem takte pawh then hran an ni, a ti.
4. National Human Rights Commission-in kumin Jan leh May thla inkara CRPF mi 19 intihlum an awm nia sawi chungchangah Union Home Secy leh CRPF Director General-te thil awmzia sawifiah turin a hriattir.



GOVERNOR

Larsap Gen (Retd) Vijay Kumar Singh an India zalenna champha vawi 80-na Independence Day puala thuchah sawiin, ram nghahfak thalaite chu ruihhlo laka inthiar fihlim turin a chah a, hmasawnna lam kawng zawh turin mobile phone leh computer ah te hun hman tam lovin, zirna leh hnathawh tur zawn kawngah ngaihtuahna sawr bing turin a sawm a ni.

(BYTE)

Larsap chuan, Mizoram thalai, nakin lawka kan ram inngahna ni mai turte chu danglamna thlen thei thil tha tak tak ngaihtuah chhuak turte, taimakna, mahni kutkawiha eizawnna siam tum tur leh khawvel changkang zelin a thlen thiamna hrang hrangte chhawr tangkai zel tum turin a chah a, mimal hmasawnna chuan khawtlang hmasawnna a thlen thei a, state a chawikang thei dawn a ni a ti.

Viksit Mizoram siam turin, state that danglam bikna hrang hrang, khawtlang ralmuang, ziaak leh chhiar thiam tamna, sik leh sa nuam, boruak thianghlim, Dan zawm tha leh khawtlang inpawhnate chu chawilarin, chawisan ni se, Viksit Bharat pawh a hnai sawt dawn a ni a ti.

Furpui lo thleng mekah mipuite chu chhiatrupna thleng thei reng lakah a theih chinah inveng se a duh tih Larsap chuan a sawi a, himna tura hotute thupek leh inkaihhruaina tih chhuahte tha takin zawm turin mipuite a chah a ni.



PRASAR BHARATI OFFICIALS VISIT

Ni 3 cham tura lo zin Prasar Bharati hotuten vawiin khan All India Radio Complex, Tuikhuahtlang tlawhin AIR Aizawl hnathawh hrang hrang an enfiah.

AIR leh Doordarshan Additional Director General Ved Prakash leh Abhishek Agarwal te chuan AIR Aizawl Studio hrang hrang leh Control Room bakah FM Station te an tlawh a, AIR Aizawl Director Pu DR Lalropuia chuan office kalphung leh khawl hnathawh dan bakah Duty inruat dan hrang hrang a sawifiah a, AIR leh Doordarshan hotute chuan AIR Aizawl in mumal taka mipui ngaihthlak tur a chhawpchuah thin chu tha antih thu sawiin FM Zoawi kaltlanga Mizo zai ngaihthlak tur awm reng chu mipui tan a hlut thu an sawi.

AIR leh Doordarshan Additional Director General Ved Prakash leh Abhishek Agarwal bakah Deputy Director General pahnih Himanshu Goel leh Vijay Bahadur Patel bakah official te hi vawiin khan Lengpui Airport lo thlengin hemi hnu hian AIR Station Tuikhuahtlang an tlawh a, hetah hian Station Director leh Mizoram Cluster Head Pu DR Lalropuia bakah AIR Aizawl-a thawktu thahnem tak ten an lo dawngsawng a ni.

Ruahman dan chuan naktuk August ni 15 hian AIR leh Doordarshan Additional Director General Ved Prakash a’n DDK Aizawl Studio B chu DDK Aizawl Complex ah a hawng dawn a ni.



SCHOOL PROVINCIALISATION DEMAND

Mizoram Government Adhoc-Aided High School leh Mizoram Government Adhoc-Aided Middle school Teachers-in provincialise an phût chungchang chu karleh Thawhlejni khian Special Cabinet meeting-in a ngaihtuah dawn.

Akashvani News Aizawl zawhna chhangin, MIGAHTA President F.Vanlalchhuanga chuan vawiin khan Sorkar lam aiawhte nen Adviser to CM (Political) Pu Lalmuanpuia Punte room-ah inbiakna boruak tha tak an nei tih sawiin, karleh Thawhlejni hian Provincialise chungchang bikah Special Cabinet meeting sorkar hotuten an neih tur thu an dawng bawk a ti a, kalphungthar sorkarah beiseina sang tak nen Cabinet Meeting an thlir tih a sawi a ni.

Byte: MIGAHTA President F.Vanlalchhuanga

MIGAHTA President chuan thla hlui July ni 21 atanga Provincialise phuta Sawrkar laka lungawi lohna an lantir chu School Education Minister Dr Vanlalhlana'n a ngen avang leh Sorkar lam (PAC) aiawhten inbiakna boruak tha zawk a awm theih nana nawrh ti tawp tura an ngen angin, nimpiah Nilai zan khan MIGAHTA leh Mizoram Government Adhoc Aided Middle School Teachers' Association (MIGAMSTA) chuan nawrh an titawp a ti a, nimin atang khan dan pangngaiin Mizoram hmun hrang hranga MIGAHTA leh MIGAMSTA school te chu hawn vek a ni a ti.

Puan tawh angin Mizoram Government Adhoc Aided High School leh Middle School zirtirtute hian sorkarin provincialised dinhmuna a hlan kai tawh ang ngeiin an vaia provincialised-a hlangkai leh vek turin sorkar an phût a, MIGAHTA-ah hian

kohhran school 8 tiamin, school 95-a zirtirtu 570 an tel a, MIGAMSTA-ah hian Mizoram hmun hrang hranga Middle School 44 atangin zirtirtu 270 an tel a ni.



MZP

Mizo Zirlai Pawl MZP chuan India National Song- "Vande Mataram" chu Mizoram chhunga zirna in hrang hrangah tih luihna hmanga sak tir a nih loh nan hmalak a rel.

Vawiina MZP President Dr. C. Lalremruata kaihhruaia MZP General Headquarters, Aizawl Executive Meeting chuan Ministry of Home Affairs-in India National Song- "Vande Mataram" India ram chhunga zirna in zawng zawnga sak chhuah ngei tur thupek a chhuah chungchangah an dinna ngaiah an la din reng thu leh Mizoram chhunga zirna in hrang hrangah tih luihna hmanga sak tir a nih loh nan hmalak nise an ti a. Zirna in chu thiam zirna tur a nih angin Politics thila hman MZP chuan a phal ngai dawnlo tih an sawi a ni.

Meeting chuan, Mizoram Hnam Hla (Official State Song) atan - ‘Ro Min Rel Sak Ang Che’ tih hla Pu Rokunga phuah chu Council of Ministers (Cabinet) thukhawmin an pawm chu lawmawm a tih thu an sawi bawk a.

Hei bakah hian Mizoram sawrkarin a Mizoram Public Service Commission (MPSC) siamthatna kawnga hmala tu tur MPSC Reform Committee a din ta chu lawmawm a tih thu sawiin, an hmalakna enzuitu tur leh rawtna hrang hrang thlen tur ngaihtuah turin Study Group a din nghal a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang



PARTITION HORRORS REMEMBRANCE DAY

Larsap Gen (Retd) Vijay Kumar Singh chuan India ram thendarhna "Partition of India" chu India ram chanchina hun hrehawm leh lungchhiat thlak berte zinga mi a nih thu sawiin, Chittagong Hill Tract then darh anih avangin Zo Chin thahnem takte pawh then hran an ni, a ti

He thu hi vawiina Art & Culture Department buatsaih, India ram thendarh a nih avanga mipuite harsatna tawh hrang hrangte hriatrengna, "Partition Horrors Remembrance Day, 2026" a hmanpuinaah sawiin, Larsap chuan mipuite tawrhna nasa tak thleng chuan ram pum nasa takin a nghawng a ti a. Tun hi thinlung hliam tih nun thar tumna leh midang demna hun a ni tawh lova, khatih hunlaia mipui tawrhate hre renga, an chhelzia ngaihhlut bakah hetiang thil duhawm lo hi a thlen tawh loh nana intiam tharna hun a ni, a ti.

Larsap chuan India thendarh chu pumpelh theih a nih thu leh India awptu leh tih chak loh duhtute avanga kal tlangpui a nih tak dante sawiin, chawpchilh takin ramri kham a ni a, hei hian pawl thui tak, ser reh thei tawh lo a siam a, Chittagong Hill Tract then darh anih avangin Zo Chin thahnem takte pawh then hran an ni, a ti a. India chu ram inpumkhat, nihna pawh thuhmun a ni tihah chiang turin zirlai kalkhawmte chahin, inpumkhat tlat na in hma lam mi a pan tir dawn a ni, a ti.

Byte: Governor

Vawiina Aizawl Vanapa Hall-a Partition Horrors Remembrance Day 2026 hmannah hian India ram then darh chungchang short movie thlir ho a nih bakah Larsap-in hemi puala buatsaih exhibition a tlawh nghal bawk. He hunah hian official, zirtirtu leh zirlai thahnem tak an tel a ni.

Prime Minister Narendra Modi, Union Home Minister Amit Shah leh Defence Minister, Rajnath Singh-a te chuan vawiin khan ram then hran anih laia nunna chante, zahna chibai an hlan a, Pu Modi-a chuan ram then hran anih avang hian mi tam takin nunna an chan thu leh chhungkaw tam tak an tluchhia tih social media-ah tarlangin mi tam takin an hmangaihte an chan a, hrehawm nasa tak an tuar a ni, a ti a, he ni hian mi tin thinlungah inremna leh inpumkhatna hlutzia intuh thar theuh tura a duh thu a tarlang bawk.



NHRC ISSUES NOTICE

Kumin Jan leh May thla inkarah CRPF mi 19 intihlum an awm nia sawi chungchangah National Human Rights Commission (NHRC) chuan Union Home Secy leh CRPF Director General-te chu thil awmzia sawifiah turin a hriattir a, report kimchang, hapta hnih chhunga thehlut turin a hriattir a ni.

Thuthar theh darhtute chuan kum 5 kalta chhung khan CRPF mi 281 mahni intihlum an awm niin an sawi a, Commission chuan report hi a dik anih chuan ramchhunga Central Armed Police Force lian bera thawkte dinhmun leh chanvo palzut ani em tih enfiah a ngai hle dawn tih a sawi a ni.



J’KHAND STUDENT PROTEST

Jharkhand-ah sorkar hna lak dan langtlang neih ngiatin zirlai-ten Ranchi-ah nawrh an huaihawt chhunzawm zel a, vawiin kha ni 21 an nawrhna a ni.

Akashvani Corr sawi danin, damlohna avanga damdawi in-a awm, zirlai hruaitu, Devendranath Mahato-a chuan chaw ngheia nawrh chhunzawmin zirlaite chu an thil phut tihhlawhtlin anih hma chuan an dinna-ah nghet taka ding turin a ngen a ni.

Hetih lai hian, na zawka sorkar nawr nan zirlaite hian naktukah Independence Day pualin Tiranga kawngzawh neih an tum a ni.

